





高  
狂  
詩  
鈔

遼海劉在園著





詩本乎志志存乎出處往往抒臆爲聲結緒成韻  
本乎情之不能自抑以達其才而所謂才也者又  
非僅較量於圭合據拾於輦悅已也近之談詩者  
藉口高岑王孟形摹而吻肖之以斯沿襲旣久遂  
失其真而於出處之際茫然不知感慨激厲之所  
因發爲嘯咏徒具面目嘻詩之本於性情者果如  
是耶則盍取在園集而讀之在園集者遼海劉君  
玉衡所著也玉衡以名家子妙文譽挾其技三禿  
棘闈不得遇始就一官登車有日矣乃出其平日



所著以問世或得之板橋小步或得之旅店孤檠  
或得之綠墅青林或得之山椒水澗大半乙夜翻  
書高明逸爵之什爲多而其間籌國憂民哭父贈  
妹諸作則又見其忠愛之悃孝友之誠有不知其  
情之難抑而才之畢達者至若襟期卓犖不受羈  
紲而攄詞命意仍不爽乎繩尺之間則又其才其  
情一本乎品與識非復世之尋聲唱答句字短長  
者所可比擬君家公榦之才著於建安文房之才  
著於大曆其爲格瀟灑爲調邈綿各自成家不蹈

習響君詩大得其概不亦輝映後先歟雖然在園  
之義言乎其處未言乎其出也昌黎作孟東野序  
所謂以詩鳴其不平者耶行且筮仕矣使發其素  
所蘊蓄者以鼓吹休明賡颺治化當必有什伯於  
此者余又何能量君之才焉康熙甲子季秋山左  
新城王士禛拜書





曩以天台之遊至台州得見在園劉公昔爲郡司  
馬樽酒論文曾一序次其詩記丙寅冬也歲戊辰  
公補括蒼太守馭五馬統十邑政事方殷余以一  
杖千巖萬壑間絕不復作來謁想嗣見公八詠有  
云官舍夜深常過虎人家日午不聞雞輒歎曰有  
是哉因念公地方荒瘠如此必多清暇何所嫌而  
不一從遊請益壬申夏抵武林將訪雁蕩取道括  
蒼溯蘭谿踰桃嶺而一晤公往還息影者旬日亟  
索公別後詩讀之其丁卯詩已載使草辰已別有



小集俱久刻行茲特出近著見示余焚香浣誦酷暑每一展卷泠然清芬襲人如餐冰雪頓覺肺腑涼徹詩之移情抑何其至也但恨其所作不多公笑謂十邑簿書未免劇繁求其從容有事於篇什亦殊不易蓋公下車當枯蒼大水之後築城濬河修聖宮詳積荒種種凡可爲民請命以培元氣者無不致其力焉間以其公餘一及詠歌則公之以經濟播爲文章大約必有所感觸而後作非僅同晉魏清言已也又曷存乎見少耶枯蒼列之洞天

號曰蓮城郡治居萬山中枕白雲向南明右三巖左亦有石門瀑布以遙絡之諸峰名勝環拱如芙蓉瓣瓣旋遶昔元微之自詫會稽郡治爲小蓬萊形之酬唱而公則擁青蓮花日坐臥嘯詠其中其詩品自應壓倒長慶矣或訊公詩自佳疑或涉宋而余謂論詩如九方臯之相馬當在牝牡驪黃之外誠不以是也論聲調唐之元白已肇蘇陸論氣味宋之歐梅豈減韋柳他如半山石湖諸老誰得以非唐目之蓋一代自有一代之詩氣運所至各



不相襲要豈有不從漢魏全唐之詩穿穴浸淫而出之者倘中無所得規規於句調之間雖彷彿少陵謫僊人銖黍學步刻畫衣冠了無生氣亦奚以爲語云自是君身有僊骨他人那得知其故公之謂也世不乏明眼余豈阿私哉秣陵南邨張惣拜手謹序

詩與政相通古人蓋嘗言之後之人不得其道以兵農錢穀爲繁猥以從容嘯咏爲清致如阮嗣宗之盡壞屏障崔斯立之對樹二松日哦其間皆騫彼遺此未知相通之故者也夫詩以言志事上則志忠蓋治民則志惠利立身則志廉平勁直本是數者而醞釀含咀出言有物一唱三歎類非凡響昔元次山作春陵行杜少陵和之願其叅錯天下爲邦伯爲生民吐氣此豈可但以詩目之哉觀察遼海劉公自其少年時雅善稱詩曩佐郡於台刻



其近草屬余序余讀其詩知其政必可觀也後果以循績鵲起東南逮守枯蒼治行彌高迄今觀察浙東峻潔慈和聲望益赫然十餘稔間敷歷所至事上治民立身之實無一不寓之於詩而流連景光低徊琴酒酬倡之什亦盈於篇俊刻而逸葳麗以新蓋有所以詩者而詩名焉公之詩集公之治譜也吳子寶崖請合其前後所作重爲刪定而付諸梓更名葛莊詩鈔復索余序海內知公詩者衆矣何待余之瑣瑣特以余前序之不爽則今此卮

言或不至無當也自此竟其用以展其學將如召康公之卷阿臯陶之賡歌以鳴國家之盛焉又何次山之足擬乎治年家眷弟高士奇頓首撰





文章有自然之境惟會心者自得之寓內一事一物莫不有自然之道存焉特日習不察輒以尋常耳目遇有俗心無真氣而生趣漸滅盡矣若夫會心者領畧豈在遠哉操是以論詩其尤甚者也古人如池塘春草空梁燕泥以逮楓落吳江諸句單詞片語膾炙人口惟其妙合自然耳至於摹畫情景在在逼真者唐則有白樂天宋則有陸務觀兩公而外或風格聲調高出其上者尙夥而論自然之境必以兩公稱最吾於本朝又見在園劉公



公遼左名家也天質高邁於書無所不闕一覽記  
誦無遺又抱負經濟以古大臣自命謂優文學而  
詘於政者非才人也而要以自然爲本根自其少  
時用文章應制舉籍甚京國既而格於新例不得  
已以蔭得郡丞倜儻非常之概恒於詩乎黻之所  
稱在園詩集是也自是官吾浙台州司馬天台旣  
僊境公以僊才臥理其中適有入賀 萬壽之行  
途間得詩頗富一曰種天齋近集一曰使草尋遷  
處州太守政事風雅日與山川相映發督撫重其

才屢借攝杭州太守事兼攝按察驛傳兩篆有詩  
曰辰巳小集又總刪其詩曰刈存艸有蕪子瞻之  
風流焉旋以尤異遷副使觀察九江督撫又疏畱  
觀察溫處新政赫然與詩一變有未刻稿曰省齋  
草余辱公文章知己逢人說項斯者久矣會連遊  
江右不獲望見顏色今年戊寅九月過東甌謁公  
出其前後已刻未刻詩命爲刪訂總名之曰葛莊  
詩鈔帙成又命序其緣起噫公之於詩誠可謂妙  
合自然者矣語云絲不如竹竹不如肉取其漸近



自然此猶人力所能至也若詩則出自性靈廣諸學問而又隨所感觸無不可供我采掇則天分居其半矣昔樂天詩成必令老嫗解而後存故其詩切近人情確不可易或嘗疑其率易後人見其原稿竄改塗乙有不存一字者其矜貴可知務觀詩自鉅至細無不曲寫入微幾於撚斷吟髭而不屑爲人所愛然使人不能不愛不啻親履其境目覩其事皆人所難也迺後人猶議樂天失之俗務觀失之纖論亦刻矣今公之詩雖極自然未嘗不鏤

心刻畫兼有兩公之長而去其短鳶飛魚躍觸處皆是直如化工之肖物微會心其孰能與於斯而况政績表表尤駕乎兩公之上者哉夫公之才詩特其緒餘耳余觀公治溫處訟簡刑清不動聲色而民咸化於善頌聲籍籍人口蓋爲政亦本諸自然而然如今之能吏以精明苛察爲事者也宜其詩之和平善感乎世有會心者讀公詩而審其聲音得其性情想見其政事必以余言爲允也夫康熙三十七年十二月治門下士錢塘吳陳琰拜手



謹序



較訂觀察公葛莊詩成附題四首

幾編傳播滿江關俯視時流直等閒三度題殘剡

中紙十年看盡浙東山公三任皆在浙東神行魚鳥空明

外興在烟雲遠近間寂是虛心似脩竹手親刪後

要重刪

為政心閒世所無戟門散帙更投壺慣聞東郡留

王謝難得鹵湖借白蕪拂几松風吹塵尾捲簾山

月照蝦鬚此中何限抽毫思半為憂民半自娛

眼前俗調任喧囂日把清詩當奏韶吟入山中雲

可贈吹來臺上鶴能招陶弘景白雲嶺王子晉吹笙臺皆隸甌江情將

移處都如話景逼真時不易描却笑巴音殊靡靡

也煩傾耳到漁樵

中唐才子數文房千載風流又擅場觸目人稀憐

古木往年公見寄詩有終日逢迎惟古木句銷魂春到愛斜陽公近作西

時立春詩春向斜陽雲微河漢情俱淡草長池塘



夢亦香。從此鷄林爭重購。千金欲富賈人裝。

已卯立春二日吳陳琰載拜識



康熙辛巳夏遼海劉使君在園以溫處觀察  
陞見當

上意命廉察江右將之任秋中道過吳門以所爲  
葛莊詩鈔謁予而屬以序先是予素聞使君爲政  
寬仁得民和文章爾雅尤長於詩令讀之藹然和  
吉不尚雕鏤揆之巧天真流露襟期瀟灑凡登  
臨山水懷人感物與夫籌國憂民之心敦厚斐惻  
並形于篇什予於是而知使君非徒詩人蓋仁人  
也於以被諸絃歌聲音之道與政通矣或者謂溫



處地僻事簡故使君得專精於吟咏今廉察豫章以陳臬秉憲爲職將日勞心於鈎金束矢八辟三刺之不暇而暇爲詩乎且風雅之道春生刑獄之事秋殺其致殊也是不然刑所以弼教而輔德禮之窮其道主生而不主殺故舜曰侯以明之撻以記之欲並生哉又曰工以納言時而颺之則刑不廢詩也明矣原詩所由興始見於帝舜喜起之歌而其時賡載歌者皋陶也皋陶刑官也詩不云乎淑問如皋陶在泮獻囚使君旣仁人又敦詩必緩

刑而尚德興學章教格民以禮禁暴止姦刑期於無刑可知也吾聞翼軫分星在豫章晉天文志云翼星明大禮樂興軫南三十二星曰器府樂器之府也使君爲政將見豫章之域圉土空而頌聲作使君詩日益多鏗鏘發金石不特上應器府予且望其繼皋陶而賡颺康哉之歌於帝庭也已商丘宋犖撰





葛莊詩鈔

丁巳  
戊午

遼海劉廷璣玉衡

一字  
在園著

卷一

在園

平生寡所營  
幸能免碌碌  
紙窗石几間  
書對古人讀  
明月映梅花  
輕風弄疎竹  
小盆石亦奇  
小池水亦綠  
不必深山中  
山中意頗足

獨坐

獨坐有奇趣  
地靜心不煩  
經史對師友  
事理探淵



源木石無俗情相與侍周軒童子不掃徑主人只在園閉門常謝客客至多繁言

酌酒

移席蒼苔軟開尊淡月斜關心驚早滂與客話桑麻爽蕨清宵露香傳靜夜花醉來孤榻穩有夢到山家

藏書

地僻容開卷窻明不受塵耽佳應有癖喜購豈辭貧坐臥逢良友行藏問古人終須求甚解莫負百

年身

至日 上侍 太皇太后溫泉回羣臣候

駕景山次宮詹沈繹堂先生韻二首

上林花木靄朝暉香氣氤氳 玉輅歸豹尾飄揚千騎擁龍旂掩映五雲飛數行鷓鴣來青嶂一路簫韶入紫微不是 宸衷寄遊賞湯池旋蹕奉慈幃

巖外雍雍肅百官遙聽雲際響和鑿灰飛葭管陽初動日滿瑤臺曉不寒 聖母心勞垂訓遠 文



唐莊宗詩金  
孫念切守成難 天家孝治凌千古願附詞臣紀  
筆端

早春宴董中丞宅

御水迴環甲第新珠簾不捲靜無塵笙簫細按房  
中譜花木潛移郭外春翠館風和鳴孔雀玉堂香  
煖臥麒麟醉餘一騎歸來晚正落西山月半輪

酬張越千

天涯何地覓知音傾蓋論交意氣深到處看人餘  
白眼少年結客散黃金數聲鐵笛三更月一曲瑤

琴萬古心愧我迂疎亦同調春宵連榻共長吟

齋居四首

春光曾不許人畱畱得春光誰復愁今古人同新  
舊曆乾坤春比去來舟芳樽爛醉花堆砌孤笛橫  
吹月滿樓長嘯一聲星斗散碧空無際水悠悠



高臥匡牀曉夢殘。伴人清瘦竹光寒。穿來曲徑青  
千箇。送到閒窻日幾竿。有礙漫言天地小。無營始  
覺水雲寬。年來每閉長安戶。自揣迂疎涉世難。  
咫尺豐臺阻鳳城。春來底事獨關情。開殘紅藥應  
三畝。轉入黃鸝第幾聲。風雨小樓牽酒債。煙霞芳  
渚負鷗盟。半生荏苒羞雙鬢。朝市山林兩未成。  
豈厭輕肥薄五陵。素甘淡漠愧難勝。未曾入世驚  
騎虎。何事干名畏履冰。陋巷門通沽酒市。虛窻風  
亂讀書燈。清宵却少關心夢。半榻煙雲一曲肱。

遲祝石公明府不至

以懶廢逢迎。苔痕滿徑生。不教童子掃。惟待故人  
行。鶴穩閒中步。茶喧靜裏聲。日斜車未至。獨坐晚  
風清。

和友人山莊

山莊儼在浣花溪。何事低頭自種畦。半世風塵仍  
草莽。十年親舊迥雲泥。時逢病後悲雞肋。日看山  
中過虎蹄。誰惜衡門常寂寞。一枝未假上林棲。  
風



春光吹去已難尋。猶向疎櫺。日夕侵樹底。亂飄紅  
兩淚。鳥邊輕送白頭吟。初鳴竹苑。岐王鐸乍入湘  
江。帝女琴。燕子歸來。簾不捲。空堂寂寂。晝沉沉。

夏夜漫成兼懷旭上人

捲簾纔罷捲茅蓬。呼取長天一片風。明日夏炎星  
影密。經旬無兩月光。經迎涼。每坐清宵盡。苦熱翻  
眠白晝中。忽憶禪房看瀑布。應嫌衣冷萬山空。

題畫二首

古木陰蒼崖小橋。通狹路溪山不見人。應在雲深

處

披簑過板橋。瓦甌提隻手。風雪在梅花前村。有臘

酒

洛陽道

三月洛陽道。春風拂面低輕車。芳草路駿馬綠楊  
堤。羅綺欺花色。笙歌亂鳥啼。相逢都一笑。歸路兩  
凄迷。

箜篌引

公乎公乎何太狂。得狂之正狂。何妨豈以入地上



天視性命如塵土要在轢古凌今得志氣之昂藏  
乃公頭白愈無賴眼前生死爲戲場披髮有何意  
提壺向何方竟入水中身不顧妾一見之刀割腸  
岸上連呼千萬聲隨波不應去悠揚忽焉人不見  
四顧空傍徨安得玉龍倒挽河中水使妾相救水  
中央安得長鯨一吸無餘滴使公無恙仍徜徉河  
水洋洋妾心孔傷止公而公不我顧今惟見銀濤  
萬頃之瀾茫妾雖生而奚爲兮願隨湘波灑血淚  
之英皇

銅雀伎

銅雀臺上秋風來秋風蕭瑟管絃哀總帷空設一  
杯酒遙望西陵土一堆一堆黃土催歌舞幽期偏  
自當三五侶伴徒憐舞態嬌傍人未解歌聲苦當  
時悔不使從君死向泉臺共一墳漳水東流鄴城  
圯朝爲行雨暮行雲可憐此日顏非昔幾度凝眸  
向瑤碧明月宵寒照綺窻悲風日暮吹松柏明月  
悲風幾斷腸夢魂猶自理殘妝獨對菱花無限恨  
悞人頭白是君王



咏史五首

救趙名成重古今  
夷門七十有知音  
當時漫說偷符計  
也是雞鳴狗盜心

偶向風塵為報讐  
事成便與赤松遊  
若教一擊秦皇中  
不拜人間萬戶侯

王孫曾未有人憐  
千古名因一飯傳  
何物淮陰老村嫗  
知人翻在漢皇先

未央宮裏中陰謀  
大將翻輸婦女流  
蒯徹前言安足悔  
祇應悔不學留侯

武擔山下創新都  
漢室中原業已無  
却為小讐忘大義  
不誅篡賊但征吳

韓孝廉過訪以詩見貽依韻奉酬

便脫衣冠坐綠苔  
留將青眼向誰開  
納涼竹外風千葉  
邀醉池邊月一杯  
苦欲滌煩呼細茗  
酸能消渴試新梅  
不嫌地僻人疎懶  
乘興攜詩好再來

伏日次申鳧盟韻

檢曆何時大火流  
日長苦熱不登樓  
樹間鳥雀驚狂叫  
壁上山川喜臥遊  
對客忘形拖葛屨  
呼兒從



俗曬羔裘關門性自耽幽獨敢謂余生世寡儔

涼夜卽景

牛女殷勤漏漸長六郎花護睡鴛鴦一襟沾濕松  
間露兩袖攜歸水上涼貪看月明先滅燭恐妨荷  
氣罷焚香徘徊夜半無人語惟有鐘聲到畫廊

無題

彩雲飛過小紅樓片片東風未許畱滿地閒花誰  
解語接天芳草不忌憂客懷荏苒添新夢人面依  
稀憶舊遊一去又陵消息斷雙星遙隔夜悠悠

新秋涼夜效陳子昂獨坐思遠率成十韻

泉石開清曠惟閒與靜宜孤懷成獨寐漫興寄新  
詞竟日簪千帙臨風弄七絲水中聞地脈花上察  
天時蛩語驚秋早松陰得月遲詩成一寸燭酒漉  
又加皮落拓難忘醉逍遙別有思風塵多未返得  
失竟誰知白鶴爲車騎青龍化杖藜欲隨雲共御  
髣髴到瑤池

子夜四時歌

紅豔正芳菲無奈東風惡郎情解惜花忍使花零



落

默倚池上欄忽墮手中扇驚起鎔回頭早被鴛鴦

見

黃花獨自開花外更徘徊望盡天邊雁都從別處

來

金鴨香燵冷銅龍漏水多縱有夢懷草其如不寐

何

至田家

消盡輕塵細雨中我來田舍喜年豐摘瓜老婦還

嫌嫩撲棗羣兒不耐紅未入倉箱先祭社全登場  
圃中輸公慙慙爲客供雞黍野外猶存太古風

秋夕

半榻依然臥草萊秋聲入耳倍生哀林端敗葉風  
收盡塞外嚴霜雁帶來疎懶習成筋力倦窮愁久



耐歲時催新方學得消長夜一卷殘書一酒盃

送中表遊金陵

吁嗟遠行人夜黑路砢砢吸煙却曉寒馬上敲石  
火辛勤誰使然行役心瑣瑣俛仰竟何之薄言趨  
汜左汜左有故交富貴寧知我田園早歸來歡聚  
貧亦可

冬陰

萬木無一葉風定寒煙結彤雲下屋簷欲與梅花  
接呼童備蹇驢尋詩灞橋雪

笑余

笑余出處無深謀空坐蕭齋生隱憂白日雲遮影  
淡淡小窻風裂聲颼颼便逢佳節未嘗樂除却醉  
時都是愁何似西山隱老衲安然一鉢終林丘  
不寐

雪後風無定雲開月有陰花搖窻上影竹作枕邊  
吟易醒三春夢多愁五夜心但聽鐘漏絕轍跡往  
來深

習靜



落日淡中圓晴雲散碧天鶴歸花底夢鴉破樹頭  
煙習靜開千帙忘機對七絃閉關無一事何必愛  
逃禪

行

春遊二首

嫩綠微黃變柳條青帘搖曳遠相招尋春爲問春  
何處半在豐臺半草橋  
聯騎歸來徑欲迷東風吹向板橋西隔林嬌鳥迎  
人語一路香塵送馬蹄

東園小集分賦得樹葉限韻

疎疎密密影婆娑點綴亭臺次第多窻外搖風吹  
客夢河干顫兩滴漁簑不辭辛苦千門蔭得荷生  
成衆鳥窠堪惜嬌紅零落易一春娥媚竟如何  
野外次韻



嘯遊貪日暖得醉不思家嫩綠新歸柳嬌紅半入  
花雲開平野濶村靜夕陽斜回首投鞭處山山鎖  
絳霞

述懷

古豈爲富貴而始讀詩書今乃了章句假此爲捷  
途偶然拾金紫昂首踞軒車只此意已足不復問  
其餘味理寡遠識悔吝常與俱我亦求名人矧乃  
爲飢驅介在出處間臨岐重躊躇

山中吟爲林山人賦

山人日向山中臥一枕煙霞鳥飛破好夢還同鹿  
豕遊柴門只許漁樵過打棗成歌亦可歡捕魚呼  
酒堪爲佐峰與雲峰兩鬪奇濤共松濤遠相和招  
來老鶴白雙雙數去修篁青箇箇懸崖古樹倒開  
花上有啼猿相對坐一聲長嘯山忽鳴山人殊覺  
山中大

姑蘓柳枝詞和汪茗文太史六首

姑蘓臺畔屢徘徊走馬曾經此地來折斷舊枝今  
又長離人一去幾時回



窈窕臨風態更嬌  
館娃宮裏舊妖嬈  
自從越國兵來後  
不與西施鬪舞腰

錦帆涇上卽天涯  
拋擲于今幾歲華  
不道郎心如逝水  
翻言儂意似楊花

夢見歸舟醒又非  
行春橋下景依稀  
高樓盡日凝妝望  
不及楊花到處飛

淡蕩春風各一天  
長條無數半塘煙  
依依不挽郎舟住  
萬縷千絲亦枉然

欲眠欲舞動春思  
好句拈來付雪兒  
又向旗亭增

一拍大家齊唱柳枝詞

郭价人侍御假驢山遊

林臯披拂杏花風  
瀟灑誰能雅興同  
每愛尋芳頻載酒  
偶思策蹇易乘驄  
一鞭斜日春方麗  
幾樹殘梅雪未融  
自笑疎慵常閉戶  
可能分與陌頭紅

暮春

芳林幾日綠成圍  
獨坐空堦晝掩扉  
風剪落花香片片  
雲迷新鷺影微微  
關心又見三春老  
回首徒傷萬事非  
豈是良才難隱世  
待時甘守釣魚磯



花豫樓對雨

近山雲易合極目雨蒼茫  
點點花邊濕聲聲竹裏長  
爲愁添酒渴因憤益詩狂  
狼籍春將老凭闌欲斷腸

夏日閒吟二首

帝里閒居似遠村輪蹄終日任人喧  
鶯兒喚起仍欹枕鷺子歸來早閉門  
新綠兩翻叢竹影殘紅霞落小樓痕  
非關故學嵇康懶塵事紛紛未敢論  
從容曳履寄閒情得向衡門托聖明  
雨露桑麻

千里遍東南兵甲一時清空堦日暎花如笑  
曲徑人來鳥不驚最是家園餘樂事松陰小院讀書聲

題友人遊草

得遂逃名計遨遊任爾狂  
乾坤雙白眼湖海一奚囊

戲書蕉葉

疎雨蕭蕭響易哀芭蕉誰向北窻栽  
寸心似與看相約每向風前展不開

客至



交久能容禮數寬，葛衣草屨頗相安。才非著作貪  
搜句，量只尋常愛合歡。弄日翩翩紅齒齒，梳風搖  
曳碧琅玕。火雲變盡隨時態，攜手同君閣上看。

午日

又是龍舟競渡時，飛騰無復少年癡。老人待午成  
丹藥，兒女先辰繫彩絲。正放海榴紅爛熳，新栽風  
竹翠參差。微吟薄醉昇平日，不用沉酣讀楚詞。

題陳道士山房和壁間韻

九還金液就丹砂，不道僊人亦有家。雨採芝田松

作蓋晴披玉簡鹿，排衙開尊小閣壺。天近送目高  
臺鳥，道賒不識何年塵事畢。早來結伴臥煙霞。

估客詞

年年別思荒江渺，此行記取歸來早。縱得千金意  
若何，紅顏幾向空閨老。一尊相送復悲歌，寸心別  
自生煩惱。聞道金陵三月時，城邊無數閒花草。

烏棲曲

長安道上遊俠客，千金倚醉邀瓊碧。結同心歡何  
已，東方未白嬌欲起。小窻朦朧月漸低，開戶視之



烏尙棲寂寂城頭霜滿路亂挽雲鬟竟歸去

懊惱曲

歡去深懊惱懊惱雞鳴早縱使雞鳴遲畱歡得幾時

大堤曲

楚楚大堤女盈盈堤上遊卻疑來往客何事只回頭

思鳳曲

有小引

趙家飛鷲傳掌上之僊羣吳氏彩鸞設臺

邊之甲帳是以兒稱作雪妃喚爲梅歌聞  
子夜之聲譜載小名之錄麗人思鳳者綺  
羅豔質花月名姬染翰填詞不意薛蘇今  
日清歌妙舞何殊蠻素當年但憐偶入風  
塵每自羞爲雲雨簫樓綽約非鳳誰居琴  
院淒清以凰自况結同心之梳子一往情  
深灑並蒂於楊枝三生願遂爰成里語代  
述芳衷

手挽鞦韆索爲罵東風惡芬芳寧幾時旋開復旋



落花開只博一時歡花落更無人可憐自愛紅顏  
須及早肯教異日悔當年於今名冠青樓久珍珠  
十斛尚難偶只愁零落幾分春滿眼繁華無一有  
身後身前事已明風塵回首卽蓬瀛妾心久蓄文  
君志若個求凰似長卿章臺閱盡人難遇獨向花  
前淚如雨何時樓畔彩雲生玉簫聲裏雙飛去

白紵舞歌贈妓素芳

小堂春暖夜色清銀燭煌煌鶴燄生長安公子悅  
傾城最愛美人舞態輕嫣然嬌起爲君行白紵長

巾手中擎手擎白紵漫縱橫坐中有目無定睛忽  
從紵裏轉嬌鶯度曲入心心自驚雅意似明還未  
明復使秋波挑豔情滿斟美酒待君傾欲終不終  
遲其聲歌殘舞罷月正盈秉燭須與明月爭醉來  
低語向卿卿轉眼城頭漏五更

白溝晚渡

匹馬河干夕照斜長堤十里接平沙一年好景初  
垂柳二月餘寒未見花狎水春禽翻白浪插天晚  
樹鎖紅霞前村只在煙濃處隨意投鞭問酒家



次真定

昔過是何日今來逢早春  
斷橋遲渡馬流水送行人  
不改陽關舊惟增梵宇新  
鴉啼天欲暮迢遞逐風塵

獲鹿縣山行

昨渡滹沱望欲迷此山正在白雲西  
今來始識峯巒好不住惟聞鳥雀啼  
幾處村墟時隱見一行車馬忽高低  
誰云此去無流水石咽飛泉響碧溪  
井陘道上

此地昔稱險驅車我亦過  
半山人徑窄亂石馬蹄多  
翠壁生雲霧蒼松掛薜蘿  
盤空登絕頂憑眺意如何

過固關

過此皆三晉煙雲拂面來  
四圍山自合一轉路能開  
穴土成村久攀崖負水回  
月明遊子夢何處是燕臺

壽陽早發

帶夢上征鞍嚴城畫角殘  
出門迷去路倚劔逐遙



灘萬壑悲風急千峰曉月寒危坡頻下馬辛苦憶  
長安

山行二首

雙雙野鳥自相呼疊嶂層巒宛畫圖聞說雲從山  
上起上山高處覓雲無  
淡紅披拂杏花妍鳥哢溪聲別有天寂寂山深人  
不到一村雞犬臥寒煙

香山道中次盧五華中丞韻

曉風歷歷散棲鴉躡屐追隨石磴斜洞口雲封樵  
子路橋頭帘拂野人家長林啼徧知時鳥荒徑開  
殘隔歲花微祿買田何日遂幾回空憶邵平瓜

頻年

頻年涉歷事多奇清夜沉吟每自疑白壁投人猶  
見妬黃金結客竟成癡松筠雪後凌千尺楊柳風  
前颭一時獨有畫梁雙鷺子舊巢棲穩不輕移

山莊病遣

秋高葉落半西山寂寂荒村但掩關往事悔從忙  
裏鎔此身贏得病中閒林臯亂影鴉千點樓角新



痕月一灣酒綠燈青時薄醉愁深恐使鬢毛斑

贈沈雍南和高澹人太史原韻三首

日讀連牀太史書頓教俗駕結交疎較讐不棄城南客時向荒園飯曉蔬

賜第能容一酒翁閒中著述幾芟龔左丘國語龍

門史何幸先生得耳聾

雍南重聽故云

供奉飄然思不羣樓成八詠貯休文虛窻夜夜堆雲裏燈火遙從太乙分

寄懷友人

縱是豪遊亦異鄉一鞭款段幾斜陽煙迷古渡千章樹葉落深秋萬里霜別後漸看明月白歸來同醉菊花黃臨岐有約君應記莫使西風老客裝

南樓曉霽

一夜斷續聲人臥梧桐雨凌晨上南樓涼風蕩煙霧欲晴未易晴日淡西山樹浮雲沒太虛悠揚何所慕紛紛出岫來不解歸岫去

野人餉棗

野人修田具偶然到城闕貽我棗數升云是園中



結執手各依依酒蔬聊復設不解作繁文桑麻好  
共說晚留醉鳳城掉頭那肯歇性樸畏煩囂徒教  
夢不潔郭外無金吾還山走明月

旅中秋曉

曙色動林鴉淒風冷碧紗客迴千里夢烟起萬人  
家屋白浮霜瓦山紅印曉霞素懷貪寂靜何事逐  
塵沙

暮秋有感

頗怪秋容瘦蕭蕭萬籟殘霜催花入窖風落栗登  
盤性懶謀生拙才疎涉世難悲來思宋玉賦就與  
誰看

訪劉統轄

東海從龍一老臣歸來久矣謝風塵卜居市遠  
逢迎少對客心閒笑語真架上蛛絲封鐵甲堦前  
豹耳臥花茵當年豪氣今存否白髮蕭蕭杖履新

輓商南令盧益菴歿節

益菴楚人

身與孤城誓始終千秋壯氣貫長虹魂飛衡岳烟  
雲暗血漬秦川草木紅末吏竟能完大義盛朝



應自恤孤忠定知青史無遺畧聊復題詩備採風  
秋夜感懷

一片砧聲別院敲多愁何地可能拋深秋籬菊仍  
新蕊薄暮宮鴉復舊巢莫負良宵償酒債况逢明  
月上松梢躊躇身世情無限任爾浮名等繫匏

釀酒

讀書至本草披閱閒窻久因知五加皮可以釀美  
酒飲多令人壯飲久令人壽不必採深山長安市  
亦有一剪數萬片一釀數十斗盛來琥珀浮滴處  
珍珠走豈曰駐我顏聊以適我口往古學僊人瑤  
池今在否我固縱飲者愛此掃愁帚林泉我為主  
風月我爲友相對卽沉酣落落羲皇叟

秋夜吟

昏鴉飛盡銀河見月出海門光一片何處蕭條萬  
籟鳴疎林葉與西風戰颯颯虛窻寒氣生清砧亂  
搗誰家院燈火羣兒課讀書星霜大婦催裁練撫  
時欹枕不成眠寒蛩四壁聲聲怨

聞雁



露冷堦除夜氣清  
半天嘹唳月三更  
時方多忌歸沙海  
秋以爲期過鳳城  
戍婦十年今夕淚  
旅人千里故鄉情  
儘教南北生悲怨  
會否平安寄一聲

平坡庄野老留飲

野老相邀處悠然  
一草堂井垂龍爪  
樹園抱虎皮牆  
鷄黍家風淡桑麻  
客話長從來愛淳樸  
與爾醉斜陽

涿州曉發

一枕茅簷夢正賒  
披衣驚起向天涯  
月收塔影千

門曉日照雲光  
萬里霞廢寺荒涼  
先主像居人指  
點故侯家  
幾回遊子曾經慣  
颯颯悲風捲黑沙

鄭州道上

柳帶長堤十里餘  
香塵曾御六龍車  
隔溪夜集漁人網  
連驛星飛羽騎書  
九省津梁兼水陸  
萬年基業永居諸  
憑高遙望前村好  
婦子耕桑得自如

送友人之山左

驪駒唱罷柳陰中  
攬轡泱泱大國風  
此後相思渺無際  
夕陽一片海雲紅



昭君故里

當年若占漢宮春  
寵幸於今事已塵  
青塚芳名畱  
得在始知延壽亦恩人

荏平縣

曉發荏平縣  
柴門凍未開  
千家安枕席  
孤客走塵埃  
樹色青燐閃  
鐘聲白月來  
臨岐逃去路  
滿目盡蒿萊

次雙堠

不記南行路  
驅車又暮天  
林藏歸鳥夢  
村鎖夕陽煙  
沂水開還凍  
蒙山斷復連  
鄉關何處所  
回首白



雲邊

過張夏

萬水蕭疎響朔風遙天歸鳥下寒空一鞭羸馬渾無力人在荒山落照中

宿州卽事

沙飛千里朔風寒閱歷深知比戶難東去河工輸萬柳北來馬政集多官蘆花夜冷堪爲絮草實年饑亦當餐聞說司農經此地應將民隱達長安

築堤謠

瓠子桃花漲莫侵何時官柳插成陰年來木石渾無價一寸堤成一寸金

早發

先君守宛陵以軍務匆迫致成重疾余侍家王母在京聞信星夜馳赴

馬上淒淒幾斷魂無邊心事向誰論賢勞盡瘁君臣義曉夜兼程父子恩滿目雲山愁裏過一天星斗望中昏宛陵侍藥知何日痛殺吾生鮮弟昆

宛陵

地連閩越古宣州兵火年來苦未休十月勞臣身許國廿齡孤子血盈眸敬亭山下春雲暗疊嶂樓



前夜雨愁獨有蒼生能戴德棠陰遺愛口碑留

述事

先君由儀部郎出守  
廣平再補寧國

宦海浮沉三十年一朝星忽殞南天忘家不作兒  
孫計報 國時聞道路傳茅屋恩深洛水月江城  
愁鎖宛陵煙那堪未了生平志獨自含悲向九泉  
微之兄自榆關至京

驚看雙鬢已蒼然多難逢君話可憐相隔迢遙七  
百里况經離別二三年摧殘骨肉晨星落痛哭家  
庭暮雨懸弟業未成兄漸老好將竹素一經傳

示垓均兩兒

汝垓志未專汝均口尙黃馳心喜遊戲畏入讀書  
堂讀書無定期所貴年富強古人教努力老大小  
悲傷憶昔 先中丞伏處在遼陽小試輒冠軍蜚  
聲滿膠庠景遇我 太宗創業重文章從 龍入  
燕都勲名已煌煌宦遊三十載勦撫定巖疆拂衣  
謝王事歸來書幾囊教汝 先大父歷官三部郎  
南北兩出守見重于廟廊并及伯與叔取次正翺  
翔彼時我少小撫頂致其傷小學古文詞口授意



益彰卽今雖半世得力尙不忘言念我家聲傳經  
有義方汝父德涼薄汝父性疎狂棘闈遭三黜一  
官猶茫茫凡此幾落寞未爲 祖父光汝父不足  
法汝 祖應表坊勗哉二小子切望繼書香

哀雁篇

盧溝橋下水聲急盧溝橋上人如織莫笑車馬忙  
莫嫌行李疾君不見秋空嘹唳雁行多行行日夜  
摩雙翼千里勤勞在稻梁萬古君臣在衣食食與  
衣關家國雁自南人自北古云人不衣食君臣道息

送沈仲謀進士南還

皆令兄古培在舍

亦識君歸是故鄉其如言別便悲涼椿萱堂上心  
千里兄弟天涯酒一觴兩岸蒹葭雲漠漠滿帆煙  
月水茫茫到時應及梅花發驛使還煩寄草堂

初冬和韻



雁鴻聲老菊花乾檢點羊裘護曉寒半壁蒼山雲  
黯淡幾株紅葉夜摧殘地連邊塞霜威早人到經  
營物力難報道天南休戰伐太平誰不慶彈冠

夜登花豫樓

莫辨西山色輕雲疊數層鐘聲深院月人語小窻  
燈寒覺今年早冰從此夜凝當風仗酒力高處任  
閒凭

西山卽景

歷盡平原到石門盤旋百尺一峰尊日臨大漠煙

光淡雪壓渾河水氣昏野寺無名惟見佛空山有  
路漸知村老人爲說前朝事翁仲欹斜舊墓存

題雪景畫

清溪環處小茅廬中有高人讀素書幾疊彤雲迷  
峻嶺四圍寒色照幽居板橋人去應沽酒箬笠船  
來似賣魚記得去年當此境梅花深處興何如

擊磬

荆山一片石有聲此中具聲始何自來聲終何所  
去一擊令人清再擊令人悟敢曰托有心聊以悅



吾素

焚香

竟日坐焚香不知香氣濃行行復歸來芳馨乃不  
同人生享晏安慎勿怨蒼穹遐心能逆想眼前儘  
從容

客中

冀北風沙易江南道路長荒鷄鳴古塞枯柳臥寒  
塘屐帶千山雪衣披十月霜此行何意緒迢遞客  
心傷

臘月十五夜對月口號

四時不放月輕還月亦多情向我圓獨有今宵圓  
更好為憐一別又明年

男

均 培 仝 校 字



葛莊詩鈔卷一終

葛莊詩鈔

巳未庚申

卷二

立春前一日偶賦

遼海劉廷璣玉衡一字在園著

纔報春歸寒欲輟此時僂覺風光別一池旭日半  
潭雲來朝消息今朝洩楊柳欲柔東面風梅花亂  
點南枝雪有情天地為幽人一年好景從新設

偶見落梅感而有作

猶將瘦骨倚牆邊粉褪香消劇可憐此際早知經



雨落當時應悔占春先  
佳人老去羞霜髮  
名將歸來惜暮年  
安得世間無恨事  
好花常在月常圓

春寒次韻

疎櫺習習晚風殘  
濁酒紅爐強自寬  
大地三冬虛朔雪  
嬌花二月畏宵寒  
書中領略何求解  
絃上先知豈用彈  
獨坐無營塵事寂  
夕陽斜倚碧琅玕

春曉

失却華胥路  
朦朧臥草亭  
無營孤榻穩  
有托一身寧  
露冷花猶困  
窗明鳥漸醒  
關心幽事曳  
履向

前庭

初夏雜興三首

花飽三春雨  
園開一畝宮  
煙光添樹碧  
日色帶雲紅  
漉酒呼狂客  
鋤苗課小童  
烹茶聲漸起  
近隔竹屏風

莫怨春歸早  
芳菲尚有期  
豈知因月閏  
翻使得花遲  
拘束非吾願  
紛爭任爾爲  
干戈千日酒  
天地一瓢詩

亦自居城郭  
何嘗冷世情  
無風煙不動  
有月水常



明意氣堪千古文章誤半生山中多隱者藏拙豈  
藏名

送友之山左幕

汾水歸來未數旬又從齊魯涉風塵正逢天上團  
圓月翻照尊前離別人法語莫辭規素友家書頻  
望慰慈親臨風幾片閒花落和淚斑斑點綠茵

在園讀書二首

西窗寂寂一燈殘誦讀無多夜已闌冷月穿籬花  
影碎悲風繞樹葉聲乾虛知百世人還易實體干

秋道所難莫負三餘當自惜少年深悔戀追歡  
濁酒燈前手自斟千秋往轍費追尋不分是否評  
無定妄用褒譏識未深訓誥下符今日事忠誠仰  
見古人心從來一字關榮辱檢點生平好自箴

咏古十首

管仲鮑叔分金

懷惠是何心翻言友道深千秋薄管鮑所重在分

金

晏嬰二桃殺三士



壯士有奇功一日成讒口翻不如後人釋之以盃酒

伍子胥覆楚申包胥復楚

成以楚為何物須臾數變更君民都不計但欲一言

范蠡載西施泛湖

家我謂陶朱富非關挈館娃試思傾國者那得更成

藺相如完璧歸趙

與借璧構爭端十五城空許璧縱不完歸城亦未必

信陵君飲酒近婦人

癡公子成名後英雄退步時要知狂縱意不是少年

魯仲連義不帝秦

人六國有君臣紛紛竟帝秦若非君蹈海殊覺世無

嫂激蘇秦友激張儀



相激得相成初無此高誼一是婦人心一屬奸人計

項羽不渡烏江

百戰成烏有英雄重慘悽此江如再渡翻覺負虞兮

司馬相如東方曼倩

詞賦才原異詼諧諫却真空憐逢武帝埋沒兩賢臣

鹵山天僊庵示僧慧如

萬樹叢中一徑開誰將古佛臥懸厓巖分青石堪為瓦洞取烏泥可當柴靜裏山川歸老衲忙中歲月屬吾儕何時暫了塵氛累共向林泉放好懷

雨中感懷爲雍南越千賦

圭合羞從八斗分瘵饑到處賣雄文筆因得意頭將禿桐遇知音尾半焚幾杵秋聲敲暮雨滿窗暝色度陰雲傷心此夕淒清夢城北城南我共君

中秋卽席疊前韻

秋與人間一半分月華出海動龍文嫦娥藥共何



人搗兒女香多靜夜焚金粟小山垂冷露羽衣僊  
曲駐飛雲明年聚散知何處大白浮來更勸君

寄江南故人

石頭城下客經過傳道君添白髮多前日寄書曾  
達否近來好事更如何滿江宿雨雲迷樹八月秋  
風雁渡河爲語故人休問訊一官仍自惜蹉跎

偶成

幼安一榻足高眠塵事無營得坦然每日杖頭消  
酒債隨時籬畔結花緣孤鴻咽露三秋夜老樹吟

風九月天眼見昇平休戰伐藥爐茶竈自年年

題友人山居

一屋煙嵐一枕霞亂山深處楚人家懸巖白水當  
階落掛樹青蘿鎖徑斜預辨陰晴常聽鳥不知節  
序但看花客來多是漁樵輩手折松枝煮玉芽

宣武門卽事二首

車馬竟昕夕肩摩失倫次屠沽混貂蟬不復解引  
避相逢漫鞠躬低頭去如駛豈其故倨傲有物役  
其志眼前無數人無心無所事



老人不自老飾貌苦支持萬事難勉強紛紛徒爾  
爲寧餘幾歲月尙爲風塵移傾身營富貴暮景同  
崦嵫三徑有松菊荒蕪已多時

張灣道中

一騎長堤破曉煙揮鞭四顧薄陰天荒村雨後高  
低樹垂柳風中斷續蟬南北半因人事老舟車多  
爲世情牽勞勞每羨漁人樂短荻黃蘆不繫船

天津夜泊

勝國開疆舊業存地通南北控中原萬方玉食趨

天府百道金符傍海門歌舞參差燈白晝帆檣髣  
髴月黃昏凭欄四顧舒長嘯煙起艨艟處處村

成都獻捷寄贈從軍諸親友

風色蕭蕭擁大旂師分夾路勢如飛豺狼負固依  
山險將士摧枯仗主威劔閣烽煙消落日錦川  
草木靄春暉滇黔掃盡無餘孽方許將軍解鐵衣

西山龍王堂示僧

葉落冷秋山山僧意自閒寶幢紅座下清磬翠微  
間月到禪方定雲深洞不關笑看行役者前路易



蒼顏

送友之秦

勃勃英風跨錦鞵驅馳不是爲貧牽文從遊覽增  
奇氣人向風塵鍊少年燕樹幾行斜月路秦山一  
片夕陽天奚囊好貯新詩句莫惜雙魚次第傳

西邨

我愛西邨好荆扉盡日關片雲裁入畫拳石意爲  
山水靜魚梭密庭空鶴步閒偶然遲楚酌明月渡  
溪灣

夜

欲息朝來倦其如永夜清悠然絕人語時復一鐘  
鳴露似因花墜雲疑趁月行素懷甘淡泊何處可  
移情

採蓮歌二首

採蓮女採蓮回蓮舟蕩槩碧湖隈若教早蕩三春  
槩羞殺蓮花不復開  
採蓮歌聲斷續木蘭舟上人如玉忽住輕橈不肯  
前並頭花下鴛鴦宿



讀曲歌二首

晴如許空自望長天日日愁不雨  
秋露涼夜靜不能寐處處結成霜

班婕妤

秋風吹長信夜月滿昭陽一樣宮中漏如何有短  
長

拜新月

拜月不拜圓照人殊可憐拜月嫌月殘對之意興  
闌最愛拜新月香花暗自設初拜人不知再拜低

低說桂樹太淒清姮娥亦孤子正是如看時好伴  
人愁絕

卽景戲成

疎竹青青抱小庵遙天爽氣接煙嵐  
風影動孩兒菊南國香傳佛手柑  
滿甕金花初得酒扣門詞客報停驂  
到來不厭疎狂甚拂石眠雲好共談

秋郊曉望

日向塵寰亦太忙誰知出郭徧秋光  
尙餘柳色蟬聲咽初試霜華雁背涼  
村外連天沙草白馬前鋪



地野花黃農家事畢新醪熟未入柴門滿路香

慈壽寺二首

寺爲明季太后建造

額尙懸慈壽開門感慨增石欄碑有字寶殿佛無  
燈歲月雙枯樹晨昏一老僧淒然風撼塔鈴響十  
三層

舊是桑麻地前朝奉九蓮丹青光射日土木勢參  
天飛檄征三輔鳩工閱數年老人能記憶二十萬  
金錢

同沈茶星明府坐月

萬籟寂無聲空明一片白花木漾清波樓臺凝積  
雪幽人獨不眠襟期共皎潔門外多輿馬奔逐鮮  
休歇但知有晨星寧知有夜月

遣興二首

日夕雨初晴優游聊散步人從池上來雲向池中  
度憑眺獨蕭然風迴燿出樹長空一字橫心共飛  
鴻去

飲酒宜飲夜醉顏先醉心不聞門外事星月共沉  
沉眠時一天地醒時一古今醉鄉與睡鄉咫尺幽



意深

閏八月

歸餘三載畱爲閏此閏還應異別時天上再逢明  
月夜人間先醉菊花期水波徹底清何早木葉微  
黃落尙遲自是 聖朝多雨露金莖濯遍萬年枝

秋日齋中口號

有客來談相對好無人獨坐亦相宜欲尋睡法惟  
開卷怕起爭端不下棋兩積連宵因旱久年逢閏  
月得寒遲閒庭檢點多幽事卽景吟成漫興詩

止僕

一病無多日相隨只五年事繁惟授意身老不貪  
眠寡婦秋風淚孤魂古陌錢夜臺有老主好去更  
周旋

病中得張明府書

蕭蕭風雨雁聲哀臥病秋窗久不開十二年前分  
手去七千里外有書來居家每負才堪用作吏偏  
云志漸灰應是楚疆烽火後瘡痍滿目費栽培  
喜晴同沈古培小酌



落日半天紅雲霞亂彩虹池  
明雙鷺兩樹響一蟬  
風白紵秋涼早青樽晚興同  
定然有新月坐待小樓東

性拙

性拙從人棄愁深有鏡知  
世情千日酒秋興一囊  
詩蝶倦逢花住雲閒出岫  
遲晚來明月上相對若  
相期

郊行

一路馬蹄輕平沙細有聲  
遙山因霧失潦水得霜

清碑斷宮人墓基存故國  
城秋高弓力勁狐兔莫  
縱橫

送趙大員外出征三楚

暫辭郎署換戎妝三十登壇  
氣槩強破賊定歌諸  
將曲出門先賦少年行旌旂  
落日飛龍虎鼓角秋  
風騁驕驕此去勲名傳露布  
風流裘帶舊襄陽

次韻題黃源明半壁園

園分松菊水分溝分得鄰家  
一半秋地有漁樵皆  
勝侶居無風浪宛扁舟如雲  
得失心何曠與世行



藏計早周縱使星光占太史且看山水恣遨遊

陳節婦

當日應同向九泉回思空死亦徒然舅姑衰謝誰  
堪倚兒女伶仃絕可憐滴滴淚深簷下雨聲聲血  
盡樹頭鷓不須細述平生事截髮丸熊二十年

初冬郊外

猶見秋花黃滿籬無多風雨得寒遲碧空不斷歸  
南雁紅葉初翻向北枝帘掛幾家茅店酒驢馱一  
路錦囊詩幽情難與常人說惟許山樵楚衲知

紫騮馬爲佟將軍賦

紫騮聲價果超羣與爾曾經破萬軍夜戰嘶殘營  
外月曉馳衝散嶺頭雲十年未遂還家願萬里同  
懷報主勤若使圖形麟閣上玉花屹立也平分  
錢道耕之江右幕以詩留別依韻賦答



太液冰消碧水盈平明送客出春城奚囊仍返來  
時路好句還留去後情芳草斜陽行處穩桃花曉  
日笑相迎廿年歷盡江湖老莫聽山禽自喚名

正月晦日

不從郭外嘯煙霞  
傻臥長安賣酒家  
檢點春來三十日  
邀人強半是梅花

獨酌拈得十四鹽

門前車馬任炎炎  
庭院深沉不捲簾  
仍向花間開碧甕  
漫勞柳下問青帘  
丁香似與心同結  
百舌應

隨口共鉗半畝荒園堪種秫擬將寶劍曲爲鎌

水村卽景二首

幾間草閣面修篁  
習靜偏宜坐日長  
雲起任他多變幻  
燕飛何事太匆忙  
稻梁得雨秋當實  
茉莉乘風晚更香  
散步橋頭漁棹返  
一聲欸乃下滄浪  
睡去斜陽在露臺  
醒時明月滿湖隈  
清光忽向雲中沒  
涼氣初從水上來  
小艇聞聲知笛近  
閒鷗有伴傍蘆回  
夜深漁火臨流亂  
箬笠風前酒一盃  
約于比部鹵山避暑口占四絕句



人從山中來驚道長安熱豈若石林邊至今積水  
雪

誰道無棲止青山可贈君好從樵子處分取半肩  
雲

三十里松濤處處清人夢一在摩訶庵一在寶珠  
洞

十八盤上晴香山寺下兩只愁沾酒時雲深去無  
路

晚步

未須學種邵平瓜隨意山頭夏水涯興到漫同雲  
出岫晚來好共月還家忽然明滅村村火不定飛  
鳴樹樹鴉試叩柴門人已寢一宵清夢結煙霞

接李寅工書知授秦中副使

漠漠秋陰靜掩關故人書到慰加餐從軍七載君  
先仕同學三人我未官亂後兵民安不易功成勩  
撫定非難 廟堂日夜勤西顧應有天書下紫鸞

對酒

半生碌碌走風塵嘆息雙眉未一伸莊叟夢回仍



故我賈生年少不如人因循豈是謀生策疎懶終  
非涉世身莫解愁懷空對酒一年又見菊花新

重陽前一日送古培下第遊山左

一夜西風落葉殘袖攜書卷出長安今宵明月君  
同對來日黃花我獨看縱好徜徉遊子屐莫辭粗  
糲故人餐前途合有親朋在定念緜袍范叔寒

晚投諸葛莊

白草荒煙淡蒼山古道斜雁將天作路烏以樹爲  
家日暮樵歌返秋成社鼓過一帘茅店外邀客醉

黃花

思公子

十載守空閨鴻雁無消息便得君歸來妾非昔顏  
色顏色旣已衰丈夫心難猜歸來或見棄爭似不  
歸來

長干曲

片帆送郎來水風俱順利私喜弗告人來易去不  
易

秋夜有懷



陣陣西風解送愁花枝無復弄輕柔菊將秋色來  
深院雁帶邊聲過畫樓樓頭有客傷離別隣家不  
識人愁絕翠竹頻敲薄暮風寒砧亂搗清秋月記  
得當年樂事賒燈前含醉弄琵琶良夜迢迢人倚  
玉翠幃深護一枝花而今不見章臺樹縱有長條  
無折處良宵欲遣夢魂通夢魂不識桃源路

南樓

高柳分眉翠遙岑聳髻螺珠簾春十二。此處月明  
多。

懷古培遊山左

書生不慣走塵氛念爾關山跋涉勤豈爲窮愁思  
故友欲將遊覽助雄文敝裘夜冷盧溝月匹馬朝  
衝岱嶺雲植檜封松都在望得來佳句好平分

見霜有感

散盡棲鴉天已曙俄驚鴛瓦霜華度釀作凄清玉  
宇秋昨宵猶是金盤露潦水無塵徹底清荒煙冪  
歷凝紅樹萬物如人一樣衰星星鏡裏顏非故癡  
心欲借魯陽戈暖日當空盡消去



十月一日出西安門

天街玉勒控驂驢傳道今朝 帝御裘丹鳳啣來  
千歲曆黃花送盡一年秋瀛臺日射雲初散太液  
冰凝水細流緩轡橋邊頻縱目人家百萬紫煙浮  
印上人由汾陽抵都以詩見投依韻賦答  
汾水燕山路百盤芒鞋錫杖敢求安窠邊鳥熟棲  
雲穩鉢裏龍歸帶雨寒只自隨緣持半偈何須有  
意傲三竿浮踪去住渾難定月在長空水在灘

偶書示印上人

繁華滿目共茫然白髮歸來始自憐粉黛灰心飯  
繡佛英雄退步學神僊冰難久結三冬夜花豈常  
開二月天獨有岩前松栢古本來蒼翠自年年

冬日集友人水亭

酒斟玉露飯胡麻車馬塵寰隱士家閒裏情懷忘  
歲月靜中笑語帶煙霞風寒不凍長流水屋暖能  
開失序花薄暮歸來饒墊興河干攜手踏晴沙

男

均  
培  
全校字



葛莊詩鈔卷二終





